

Kursus Sembelihan pupuk nilai murni

Didik pelajar, staf UMP ikuti kaedah tetap syariat Islam



■ Mohamad Hilmi (duduk, kanan) menunjukkan cara penyembelihan haiwan ternakan mengikut syariat Islam sambil diperhatikan peserta kursus.

Sinar (Kuantan) Rabu 10/11/10 ms. 85

KUANTAN - Penganjuran kursus sembelihan ternakan dalam kalangan 60 peserta yang terdiri daripada pelajar dan staf Universiti Malaysia Pahang (UMP) dapat memupuk nilai murni di kalangan warganya.

Menurut Pengarah Pusat Islam & Pembangunan Insan (PIPI), Dr. Hasan Ahmad berkata, penganjuran program ini tepat pada masanya dalam mendidik generasi baru hari ini lebih berani dan yakin dalam melakukan kerja penyembelihan ternakan mengikut kaedah yang menepati tuntutan syariat Islam.

Program yang dipimpin penyarah Pusat Bahasa Moden & Sains Kemanusiaan (PBMSK), Mohamad Hilmi Mat Said ini merupakan anjuran bersama PIPI dengan kerjasama Sahabat Masjid (Saham), Perwakilan Mahasiswa Kolej Kediaman 2 (Peka2) dan Biro Kerohanian Su-

rau Kolej Kediaman 2.

Menurutnya, faktor pemakanan yang halal merupakan salah satu ciri utama dalam pembentukan fizikal yang sihat dan perkembangan minda serta hati manusia.

Justeru itu, pengetahuan yang tepat dan jelas mengenai kaedah penyembelihan mengikut syariat amat penting memandangkan ianya berkait rapat dengan faktor kesihatan.

"Kebanyakan anak muda hanya bergantung harap kepada generasi tua.

"Sehingga pada satu tahap, di setengah tempat sukar untuk mendapatkan orang yang yakin boleh melakukan sembelihan," katanya.

Mohamad Hilmi berkata, sempena program itu sebanyak 50 ekor ayam dan seekor kambing disediakan untuk memberi peluang kepada peserta kursus mempraktikkan

sendiri cara menyembelih ternakan mengikut syariat sebenar.

Menariknya, pelajar tidak hanya mempelajari teori dan praktikal untuk menyembelih ternakan, malah peserta digalakkan berpuasa sunat seterusnya menikmati juadah berbuka puasa di Masjid UMP.

Sementara itu, Pengarah Program, Md Khusairi Baharun yang merupakan pelajar Fakulti Kejuruteraan Awam & Sumber Alam berkata, program julung kali diadakan itu amat berguna.

Katanya, secara tidak langsung, program ini dapat mengeratkan hubungan dan mendidik nilai-nilai murni di kalangan warga UMP. Penganjuran program ini juga bersesuaian di saat umat Islam bakal meraikan sambutan Aidiladha dan melaksanakan ibadah korban tidak lama lagi.